

From
Synod Literature & Publication Board
Synod Office
Mission Vêng, Aizâwl – 796 001
Mizoram



LÂWRKHAWM

LAY LEADERS TRAINING

SMTC buatsaih Lay Leaders' Training wavi 233-na chu July 21–25, 2025 chhûng khân SMTC-ah buatsaih a ni a. Tûn tumah hian Presbytery 14 – Aizâwl Hmâr, Chhimpei, Champhai North, Lunglei East, Lunglei West, Aizâwl Bethel, Tuichâng, Tuichângrâl South, Chhimchhak, Aizâwl Chhim, Sakawrhmutuai, Sêlui, Aizâwl West–II leh Tlawng aţangin Kohhran Upa 46 an tel.

BOOKROOM REDUCTION SALE

Synod Bookroom chuan July 14-19, 2025 khân Branch tin leh Distribution Centre-ahte Reduction Sale a buatsaih a, thil zawrh zawng zawng man tlâwm zâwka hralh a ni. Reduction Sale hi a rualin ni 14.7.2025 zîng dâr 9:30 khân hawn a ni a. Headquarters Mission Vêngah chuan Rev. Dr K. Lallâwmzuala, ES i/c PRESCOM-in Pathian hnênah hlânin a hawng a ni.

THAWKTU THAR

Ni 18.7.2025 khân Synod Service Board chuan Synod hnuai department hrang hranga thawk tûr (Contract) a la thar a. Hêng mite hian ni 1.8.2025 khân an hna thar hi an zawm:

MCC Assistant Professor

Johny Lalrammawia
s/o C. Hmingthanga, Lâmchhîp

SL&PB Assistant Editor

K. Rosângliana
s/o K. Lalţanpuia, Vairêngte Zalên Vêng
Synod Higher Secondary School Peon
John Lalthankhûma
s/o H. Lalnunzira
Hlimen Dâm Vêng

SYNOD HOSPITAL-AH MRI KHAWL THAR BUN A NI

July ni 31, 2025 (Ningani) chawhma dâr 11:30 khân Synod Hospital, Durtlânga 3 Tesla MRI khâwl thar leh room chu Rev. R.C. Lalngâkliana, Synod Moderator-in Pathian hnênah hlânin, hman theih tûrin a hawng.

Khâwl thar hlanna inkhâwm hi Rev. Dr K. Lallâwmzuala, Executive Secretary i/c Hospital-in a kaihrui a. Dr Lalnunñemi, Medical Superintendent-in MRI khâwl lei tûra Synod-in a rêl dân te, hma lâk a nih dân te, tihhlawhtlin a nih tâk dân leh technical report a pe a. Dr R.L. Sânghluna, Hospital Director-in lâwm thu a sawi a ni.

3 Tesla MRI khâwl hi chêng nuai 1,480 (₹14,80,00,000/-) man a ni a. March ni 30, 2025-ah Synod Hospital hi a thleng a. A dahna tûr pindan siama bun fel a nih hnuah hman theih tûra hawn a ni ta a ni.

3 Tesla MRI thar bîkna chu:

1. Scan chhûng a rei lo bîk.
2. A fiah bîk êm êm.
3. Damlo mutna leh a khâwl a len avângin damlo tân a nuam.

4. Cancer screening-na atâna hman tlâk tak a ni.
5. 3 Tesla hi thluak, ruh chuktuah leh tihrâwl en nân a tha bîk.
6. Bio-metric leh artificial intelligence technology hmang a ni.

India hmârchhakah 3 Tesla MRI hi 10 chauh a la awm a. Mizoramah tûna mi hi a hmasa ber a ni.



HARHNA INKHAWMPUI HLIM TAKA HMAN A NI

August ni 1–3, 2025 chhûng khân Harhna Inkhâwmpui wavi 11-na chu Salem Vêng Kohhran Biak In, Aizâwlah hlim leh tluang taka hman a ni a, thupui chu 'I Pathian tâwk tûrin inpeih rawh' (Amosa 4:12) tih a ni.

August ni 1 (Zirtâwpni) zân aţangin vântlâng Pathian biak inkhâwm a awm a, Rev. R.C. Lalngâkliana, Synod Moderator-in thuchah a sawi a. August ni 2 (Inrinni) chawhmaah Pi Lianthangpuii, Peniel Revival Team Speaker-in thu a sawi a; chawhnuah Upa C. Zanghînglova, Jehova Jire Team Speaker-in thu a sawi a; zânah Pu Biakhmingthanga, Krista Thiante Team Speaker-in thu a sawi. August ni 3 (Pathianni) chawhmaah Pu C.

Lalzahawma, Hnehna Puangtu Team Speaker-in thu a sawi a; chawhnuah Pu H. Lalhmingliana, Amen Revival Team Speaker-in thu a sawi a; zânah Rev. V.L. Luaia Hrânleh, Sr Executive Secretary-in thu a sawi bawk.

Inkhâwm apiangin zaipâwl pathum an zai thîn a, inkhâwm banah lêngkhâwm thîn a ni bawk. He inkhâwmpuiah hian revival speaker 70 zîngah damlohna avângin mi pahnih an kal thei lo a ni.

SYNOD Newsletter

EDITORIAL STAFF

Rev. P.B. Zosâphara
Rev. Dr K. Lallâwmzuala
Upa F. Lalthlamuana
Lalremmawia

SYNOD CHHAWMDAWLNA

Tùn hnaia harsatna hrang hrang tâwkte hnênah Synod Relief Fund ațangin hetiang hian chhawmdâwlina pawisa pêk a ni:

Khua	Pêk chhan	Chhôngkaw zât	Pêk zât	Khua	Pêk chhan	Chhôngkaw zât	Pêk zât
Khawhai Vênglai	Lei min tuar	5	66,000	Sairâng Dinthar	Damlo	1	10,000
Falkland East	Lei min tuar	5	46,000	West Sêrzâwl	Damlo	1	10,000
Chhîpphîr leh	Damlo leh			Hmunpui	Damlo	1	10,000
Zote South	lei min tuar	3	28,000	Khâmring	Khawsak harsa	1	10,000
Mauchâr	Lei min tuar	2	24,000	Sêrchhîp Vêngchung			
Electric Vêng,				Pastor Bial	Lei min tuar	21	3,39,000
West Phailêng	In kâng	1	20,000	Khawmawi leh			
Kângmun South	Khawsak harsa	2	20,000	Khawmawi Vêngthar	Râltân	16	80,000
Lawngtlai Chanmari	Khawsak harsa	2	20,000	Kâwnpui Vênglai	Damlo	3	30,000
Zêmabâwk East leh				Dîlkâwn	Damlo	2	20,000
Zêmabâwk South	Lei min tuar	7	84,000	Sihthiang Vêngthar	Lei min tuar	1	12,000
Bethlehem Vêngthlang leh				Manikbond	Damlo	1	10,000
Bethlehem Vênglai	Damlo	6	60,000	Tuidam	Damlo	1	10,000
Thênzâwl Kohhran	Lei min dâwlina atân		50,000	Lawipu	Khawsak harsa	1	10,000
Sakawrdai leh	Sakawrdai			Cherhlon	Damlo	1	10,000
Hmâr Vêng	Damlo	3	30,000	Tualchêng	Damlo	2	20,000
Rângvamual	Lei min tuar	1	15,000	N. Vanlaiphai Vênglai	Damlo	2	20,000
N. Vanlaiphai	Damlo	1	10,000	Falkland	Damlo	1	10,000
Puilo	Damlo	1	10,000	Tlângnuam Vêngthar	Khawsak harsa	1	10,000
Dîltlâng	Khawsak harsa	1	10,000	Vaitin	Khawsak harsa	1	10,000
Bûnghmun North	Damlo	1	10,000	Tuikual North	Damlo	1	10,000
Sihfa North	Damlo	1	10,000	Tuidam	Damlo	1	10,000
Chhiahtlâng				Champhai Dinthar	Damlo	1	10,000
Vênghlon	Damlo	2	20,000	Belh khâwm			11,94,000

Editorial.....

A CHHE LAI SIAM THATU

Kan chênna khawvêl hi zau tak niin kan ngai thîn a. Khawvêl changkâna avângin, la zau viau mah se, zîm zâwkin kan thlîr thiam tawh a. Changkâna chuan thil fel lo min kawhhmuh zung zung a. Siam thatu an awm laiin tichhetu an awm mêk zêl bawk.

He kan ram zîm teah pawh hian kohhran leh sawrkâr hma lâknaah pawh siam that tûr tam tak kan hmu a ni. Bible-a Nehemian siam that hna a thawh kha a langsar a, a entawn tlâk bawk a. Siam that tûr a hmuh khân mawhpuh tûr a zawng kual ruai lo va, intihlâr nân a theh darh chiam lo bawk. A awm mai mai thei lo va, siam tha tûrin ke a pên chhuak nghâl a ni.

Kristiante hi a chhe lai siam tha tûra he leia awm hi kan ni a. Siam that hna thawh tûra Nehemia thawh chhuah dân nêk kha chuan kan thawh chhuah dân hi chu a inang lo deuh chu a ni.

Khawtlâng, kohhran leh chhôngkua siam tha tûr hian mi dang nghah a ngai chuang lo va. Kan theihna zâwnah dik tak leh rinawm taka siam that hna kan thawh hian nakinah kan tu leh fate tân khawvêl nuam kan la siam thei dân a ni.

KOHRAN HMEICHHIA

Trainers Training-ah tel

July ni 8&9 khân Lianchhiari Rûn, I&PR Conference Hall-ah Social Welfare Dept-in Trainers' Training a buatsaih a. Hetah hian Central Kohhran Hmeichhe Committee aiawhin mi pali an tel.

Training, Campaign leh Retreat

July ni 12&13, 2025 khân Leadership Training, Kristian Chhôngkaw Campaign leh Retreat hmanpuiin hetiang hian Central Kohhran Hmeichhe hruaitute an chhuak: *Vairêngte Chhim Vêng Bialah* Pi Vânlahluni, Treasurer; Dr Lalthansângi Fanai, Ex-Officio; leh committee member-te – Pi Lalrammawii leh Pi Lalrindiki. *Champhai Kahrawt Bialah* Pi K. Vânlalrâwni, Chairman; leh committee member-te – Pi C. Rosângpuii, Pi Chuauzikpuii leh Pi H. Lalthasiami.

Kristian Chhôngkaw Campaign

Kristian Chhôngkaw Campaign hmanpuiin hetiang hian Central Kohhran Hmeichhe hruaitute an chhuak:

Ni 20.7.2025 khân *Chanmari West Bialah* Pi Vânlalthlamuani, Vice Chairman; Pi Zothanpâri, Ex-Officio leh committee member-te – Pi R. Tlânghmingthangi, Pi Lalhlmpuii leh Pi Lalramngaii. August ni 2&3 khân *Thênzâwl Bialah* Pi Lalngâkliani, Pi P.C. Lalmalsâwmi, Pi Lianhnûni leh Pi K. Lalrinpuii; leh *Sumsuih Bialah* Pi Lalthansângi, Pi Vânlalchhuangi, Pi Lalbiaknungi Sailo leh Pi Lalthanzâmi. August ni 9&10 khân *Nisapui Bialah* Pi Zohmingliani, Finance Secretary leh committee member-te – Pi Lalrawngbâwli, Pi Lalhangmawii leh Pi Hrânghmingthangi; leh *Bairabi Bialah* committee member-te – Pi J.C. Ronghâki, Pi Vânlalnunsiami leh Pi Lalmani.

KRISTIAN THALAI PAWL

July ni 11–13, 2025 khân Khawzâwl Vênglai Bial KÏP Meet & Missionary Challenge hmanpuiin Central KÏP hruaitute – Rev. H. Lalawmpuia, Leader, Tv. P.C. Lalthanmawia, committee member leh Mizoram Synod Choir-te an kal.

Râl Vêngtu

Râl Vêngtu chu a vênbûk aţangin a hawi vang vang a. Pâwl khat hi hmanhmawh deuh maiin an lo kal a. "Eng nge ni ta?" tiin a lo zâwt a. "Râl Vêngtu, biak in tha pui pui kan sa a, inkhâwm kan tlêm telh telh bawk si a. Hei hi thuhrlitute an tuihnân loh vâng niin kan hria. Min lo fuihsak teh," an rawn ti a, an haw leh ta mai a.

Pâwl dang an lo kal ve leh a, "Râl Vêngtu, kan hmaa lo kalte khân i bula an sawi tûr kan hre sa vek mai. Biak in inkhâwm tlêm chhanah hian min puh tlat mai a. Min puh ang hi chu kan ni bîk lo, theihtâwp kan chhuah ve asin. Thupui tuipei zâwng riau hi an nei a, an tuipei loh zâwng chu an ngaithla peih thîn lo. Anni zâwk kha lo fuih teh," an rawn ti ve thung a.

Râl Vêngtu chu a inlêngte haw tâk hnu chuan a inngaihtuah nasa mai a. "Thuhrlitute leh rawngbâwltute tân hian kha mite kha an ţawngţai thîn ang em aw? An rawn sawi bawrh bawrh mai kha a ni si a. Thuhrlitute pawh kha Pathian thu sawi tûr hian an inbuatsaih nasa tak tak em maw chu le? A ngai hi an lo sawi tlut tlut te hi a ni zâwk ang em? Anmahni tui zâwng chauh an lo sawi te hi a ni mai ang a.

"Eng pawh ni se, fuih an ngai ve ve dâwn a nih hi. Kohhran hlata awm mêkte bei lova, kohhran bêl ve vete an inhmuh sakhi chuan inkhâwm chu pun lam aiin tlêm lam an pan tial tial mai dâwn si a," tiin fuih dân tûr a ngaihtuah zui ta vang vang a.

MSSU ZIRTIRTU TRAINING

Sunday School zirtirtu training pein hetiang hian MSSU trainer-te an chhuak:

Ni 11.7.2025 khân Châtlâng Kohhranah Upa Lalthanchhûnga leh Upa K. Zoremsânga. Ni 12.7.2025 khân Vânzau Bialah Upa K. Vânlalngâka,

SYNOD HOSPITAL, DURTLÂNG THILPÊK DAWNTE

(June 2025)

I. CHARITY FUND PETUTE

1. Pi Lalremi, Zêmabâwk North	5,000
2. Dr Lalmalsâwma Nghâka	5,000
3. Pu Zodinliana, Mission Vêng	2,000
4. R. Lalnunthari (Miss Nunui Rualhlêng) Chhînga Vêng, Aizâwl	5,000
5. Pi Chawngchhîngi, Mission Vêng	1,000
6. Pi Zochhuani Malhotra, Zârkwat	3,00,000
7. Pu Victor Zothansânga, Mission Vêng	1,000
8. K. Lalrohlu Linda, Tuithiang Vêngchhak	2,000
9. Pi Lalbiakthangi, Chhînga Vêng	50,000
10. Pi Rohmingthangi, Kulikâwn	30,000
11. Lalfakzuali CLTS Store, Mamit Field Vêng	10,000
12. Pu Zolâwma, Kângmun	3,000
13. Malsawmsânga Sailo, Châtlâng	50,000
14. Upa R. Laltlankima, Khawzâwl Vênglai	1,000
15. Zonuam Kohhran Hmeichhia	10,000
16. Nisapui Pastor Bial Kohhran Hmeichhia	10,000
17. Khawhai North Pastor Bial Kohhran Hmeichhia	3,100
18. Hunthar Pastor Bial Kohhran Hmeichhia	20,000
19. Airfield Vêngthar Pastor Bial Kohhran Pavalai Pâwl	13,250
20. Khawzâwl Vênglai Kohhran	10,000
21. Vaikhawtlâng Kohhran	5,000
22. Sesawng Vêngthar Kohhran	10,000
23. Kâwnpui Hmâr Vêng Kohhran	50,000
24. Lungdai Hmâr Vêng Kohhran	3,000
25. Khatla Pharmacy	2,000
26. Hming thup	500
27. Model Vêng (Azl) Presbyterian Kohhran	28,422
Belh khâwm	6,29,272

Upa Danny Lalremmawia; *Leitan South Kohhranah* Upa K. Zoremsânga, Upa Zionpârlâwma leh Upa Dr Lalhmacchhuana. Ni 19.7.2025 khân *Tlungvêl Vênghlun Kohhranah* Upa S. Kâpza-thanga, Upa C. Lalbiaksânga leh Upa Lalchuaailova; *Vairêngte Chhim Vêng Bialah* Upa Hrilthansânga, Upa Lalsiammawia Pachuau leh Upa John Lalnunthara. Ni 26.7.2025 khân *East Lungdâr Vênghlun Bialah* Upa K. Zoremsânga leh Upa H. Lalremruata. Ni 9.8.2025 khân *Saikhamakâwn Kohhranah* Upa Hrilthansânga, Upa Zionpârlâwma leh T.Upa B. Malsâwmtluanga; *Biate Bialah* Upa B. Lalhmunliana leh Upa R. Vânlalruaia.

II. THISEN PETUTE

1. K.Ṭ.P., Ramthar Vêng Branch	80
2. K.Ṭ.P., Dinthar Vêngthlang Branch	47
3. K.Ṭ.P., Vaivakâwn Branch	29
4. K.Ṭ.P., Leitan Branch	35
5. K.Ṭ.P., Châtlâng South Branch	43
6. Apostolic Training Institute, Durtlâng	28
7. Durtlâng Higher Secondary School	21
Belh khâwm	283

III. THIL DANG PETUTE

1. Zonuam Kohhran Hmeichhia – Grace Home tân ₹10,000/-
2. Pu Lalhnehzauva, Ramhlun Vêngthar – Driver Room-a dah tûr Samsung TV (43")
3. Upa Lalchhandama, Luangmual West – Tho vuakna 50.
4. Dr Carolyn Lallâwmzuali, Pathologist, Synod Hospital – Palliative care tân ₹1,000/-
5. Pu J.H. Laltanpuia, Phûdungsei Vêngthar – Hmunphiah 100.
6. Dr Benjamin Lalrinpuia, Jt Secretary, Indian Red Cross Society, Mizoram Branch – Grace Home tân Oxygen Concentrator 5.
7. MHIP, Dâwrpui Branch – ICU damlo awmpuitute tân refrigerator leh RO (Reverse Osmosis) Filter.

LAWM THU SAWINA: Hospital mamawh chi hrang hrang petute chungah Pathian hmingin lâwm thu kan sawi a. A lét tam takin Pathian malsâwmna lo dawng zêl ang che u. Thil pe duh tân Director (94361 41739) leh Nursing Superintendent (94361 52751)-te hnênah eng lai pawhin inhiattfir theih a ni e.

Rev. R. Lalvulluaia
Chaplain Sr, Synod Hospital, Durtlâng

DIRECTOR QTRS THAR HAWNG

Ni 19.7.2025 (Inrinni) khân Synod Rescue Home Management Committee chu Champhaiah a ṭhu a. Committee zawhah Synod Rescue Home Director Quarters thar hawna hun hman ngâh a ni.

Quarters thar hi Rev. Dr K. Lallâwmzuala, Synod Executive Secretary i/c Social Front-in Pathian hnênah hlânin a hawng a ni.

Hemi hunah hian Rev. H.S. Remmawia, Director, Synod Rescue Home, Durtlâng leh Pu Lalchhûngliana, Social Front Coordinator-te an tel bawk.

ZVC-IN HUN HMANPUI

Ni 1.8.2025 chawhma dâr 11 khân J.M. Lloyd Hall, Synod Office-ah Zirlai Viltu Committee buatsaihin Synod Resource Centre-a inziak lût tharte tân Briefing & Orientation Programme hman a ni. He hun hi Rev. Dr Rosiamliana Tochwawng, ES i/c Zirlai Viltu Committee-in a kaihruai a; Pu K. Lallianzuala, Secretary-in Synod Resource Centre din tan dân leh kal-phungte a sawi a; Rev. K. Lalrinmawia, Pu R.L. Rinawma (IRS Rtd) leh Pu Lungmuana-ten thu an sawi bawk. Briefing & Orientation hi Category 1 leh Category 2-a member thar, mi 27-te tâna buatsaih a ni.

Zirlai Viltu Committee (ZVC) hian a din tih aţangin All India Service hrang hranga Mizo thalaite an inziak tlin theihna tûrin theihtâwpin hma a la a, a mamawhten an pan theih tûrin Synod Resource Centre a din a. Centre-ah hian lehkhabu tha chi hrang hrang 300 chuanga awm a ni.

ZAI HRUAI TRAINING

Worship Department aţangin hetiang hian Zai Hruai Training pein an chhuak:

July ni 17&18, 2025 khân *Chawngtlai leh Kêlkângah* Tv. H. Lalthazuala, Music Instructor leh K. Lalhmangaihazuala, trainer. July ni 23–25, 2025 khân *Sâmthang, Kâwulkulh leh Kâwulkulh North-ah* Pu Benjamin Sailo, Music Instructor leh Pu T. Laldintluanga, Trainer. Ni 26.7.2025 khân *Tanhrii Kohhranah* Tv. H. Lalthazuala, Music Instructor leh Pu K. Lalhmangaihazuala, trainer. Tin, ni 7.8.2025 khân *IOC Vêng Kohhran, Vairêngteah* Music Training pein Pu H. Lalrinmawia, Senior Music Instructor a kal bawk.

PASTOR QUARTERS EN FEL

Trust Department aţangin Pastor Quarters en felin hetiang hian an kal:

July 9–11, 2025 khân *Chawngte L leh Tlabung Chawnpuiah* Pu Lalramênga Royte, JE a kal a. July ni 21 khân *Ruan-tlâng, Khawzâwl Vênglai* leh *Khawzâwl Dintharah* Pu Lalramenga Royte, JE a kal a. August ni 6&7 khân Silchar Pastor Quarters zir Chiang leh Synod Transit Accommodation (STA) leh Missionary Quarters sak mêk enpuiin Pu Lalhriatrenga, JE leh Pu Kros Nuntluanga, JE-te an kal bawk.

SL&PB

♦ **Literature Seminar**

Synod Literature & Publication Board (SL&PB) aţangin Literature Seminar hmanpuiin hetiang hian an chhuak:

July ni 11–13, 2025 khân *Lungkawlh Kohhranah* Rev. P.B. Zosâpthara, Editor leh Rev. Biaksailova, campaigner. July ni 17, 2025 zân khân *Thingsulthliah Kohhranah* Rev. P.B. Zosâpthara, Editor leh Pu Zohmangaiha, Asst Editor. July ni 26&27, 2025 khân *Lawngtlai Bialah* Rev. P.B. Zosâpthara, Editor leh Upa Lalthanliana, BEC member. August ni 9&10, 2025 khân *Chalrâng Kohhranah* Rev. P.B. Zosâpthara, Editor leh Pu Zohmangaiha, Asst Editor.

HULHLIAP SHORT STAY CENTRE

Mizoram sawrkâr, tlâwmngai pâwl leh kan kohhran tang hovin Hulhliap Short Stay Centre, a thawh khatna atâna Synod Revival Camping Centre, Neihbawia an buatsaih chu ni 12.7.2025 khân zawh fel a ni. A tîrah mi 256 an lût a, a tâwp thlenga awm chu mi 119 (Mipa 105 leh hmeichhia 14) an ni. Camp luh ni aţanga ni sâwm chhông chu detoxification atân hman a ni a, a hnu ni nga dang chu clinical counselling atân hman a ni a, chumi hnuah ni nga dang chu spiritual therapy hun atân hman leh a ni. Detoxification leh clinical counselling chhônga sênsô hi sawrkârin a tum a ni. Camp chhuakte hi thla thum chhông vil chhunzawm an ni ang a. Rilru leh damdawi lama mi thiam rualin a tûl angin an enkawl chhunzawm dâwn a ni.

A thawh hnihna chu ni 21.7.2025-ah tanin ni 9.8.2025-ah zawh a ni a. Thawh hnihna hi chu mipa, damdawia harsatna tâwkte tân chauh a ni a; zu vânga buai leh hmeichhe tân luh theih a ni lo. Hulhliap Short Stay Centre thawh hnihnaah hian mi 536 an inziak lût a, camping centre-in a dâwl zawh loh avângin pâwn lamah riahna tûr te siam belha, a chung zâr ni mah se, luh ni zân lama ruah sûr nasain a tihchhiat avângin an buai hle. Mutbu leh thawmhnaw huh vek an tam avângin a then chu an haw leh hlawm a, July ni 22 thleng khân mi 410 vêt an la awm a ni.

Hulhliap Short Stay Centre hi nakkum March thla thleng buatsaih tûra ruahman a ni.

MIZORAM CHRISTIAN COLLEGE

♦ **Result chhuak kim ta**

Mizoram University hnuaiia Even Semester 2025 Under Graduate exam result chu a chhuak kim tawh a. MCC-in result a neih dân chu hetiang hi a ni:

Semester	Zirlai	Pass	Pass pc
2nd Semester	110	89	80.91%
4th Semester	101	93	92.08%
6th Semester	68	64	94.12%
Belh khâwm	279	246	88.17%

Tûna MCC-in zirlai a neih dân chu hetiang hi a ni:

1st Semester	131
3rd Semester	110
5th Semester	103
Belh khâwm	344

♦ **Mentoring Programme**

Ni 18.7.2025 khân 1st Semester zirlaite tân ‘Mentoring Programme’ hman a ni a. Hetah hian zirtîrtu tinin zirlai enkawl bîk neiin – zirna, chhôngkua leh sum lama an harsatna hrang hrang an sawipui a, a sut kian dân tûr theihtâwpin an ngaihtuahpui bawk.

♦ **Freshers’ Social and Felicitation**

Ni 25.7.2025 khân MCC chuan Vânapa Hall-ah Freshers’ Social and Felicitation (Zirlai tharte lawmna leh zirlai tiţhate chawimawina hun) a hmang.

He hun hi KC Lalthansânga leh Dr Vânlalpâri-ten an kaihruai a; Upa Dr Tâwnênga, Principal-in kal khâwmte lawmna leh fuihna thu a sawi.

Khual lian Pu Lalduhoma, Chief Minister pawhin thu sawiin, Synod-in secular college tha leh rin tlâk tak a dân chu lâwmawm a tih thu a sawi a. MCC zirlai kal chhuak, University Rank Holder leh Department topper-te chawimawina hlan a ni bawk.

♦ **NAAC Sensitization Workshop**

Ni 6.8.2025 khân MCC thawktute pualin college-ah ‘NAAC Sensitization Workshop’ buatsaih a ni a, MCC-in NAAC a hmachhawn huna pawimawh zir ho a ni. Resource Person chu Dr Vânlalmuana, Govt Aizâwl College a ni.